



Inatsisartuni ilaasortaq
Harald Bianco
Maani

APNN-imit akissuteqaat § 37- apeqqummut nr. 2011-19

Aalisarnermut, Piniarnermut Nunalerinermullu Naalakkersuisoqarfiup (APNN) 18.januar tiguvaa § 37 imm. 1 naapertorlugu apeqquteqaat Ittoqqortoormiit Kangerlussuani umiarsuarnik takornariartaatinik angalasarnermut tunngasoq. Allakkiaq taanna uanga oqartussaaffigisannut akisassanngortinneqarpoq.

Apeqquteqarfigineqarpoq una:

Umiarsuit takornariartaatit Ittoqqortoormiit Kangerlussuanut killilimmik pularsarnissaat Naalakkersuisut aaqiivigilersaarpaat?

Akissut:

Pinggortitamik illersuineq pillugu Inatsisartut inatsisaanni nr. 29, 18.december 2003-imeersumi §§ 5 aamma 39 naapertorlugit, Naaalakkersuisut sumiiffinni piffissaniluunniit sukumiinerusumik killilikkanik angalanermut killiliinernik piumasaqaatinillu aalajangersaasinnaapput. Sumiiffinnik eqqissisimatitsineq Nunami Namminermut, Pinggortitamut Avatangiisinullu Naalakkersuisoqarfimmit (NNPAN) oqartussaaffigineqarpoq.

Tusarniaanermi akissuteqaatikku NN PAN-imit oqaatigineqarpoq, Ittoqqortoormiit Kangerlussuata qinnguanik, umiarsuarnut takornariartaatinik angalasarnermut tunngatillugu eqqissisimatitsineq qanittumi suliarineqalersaanngimmat, taamaattorli Kangerlussuaq "Man and Biosphere" -imi ("Inuk Uumassuseqarfiusorlu"-mi) sumiiffik annertusineqarsinnaassappat immikkoortutut ilanngunneqarsinnaasoq. Nunamut Eqqissisimatitamut aamma "Inuk Uumassuseqarfiusumut" siunissami inissisimanerisa isummerfigineqarnissaat naatsorsuutigineqarpoq Inatsisartut upernaakkut katersuunneranni oqaluserineqartussatut, taamaattumik NN PAN-imit tamatuma utaqqimaarneqarnissaa kissaatigineqarpoq, eqqissisimatitsivinnermut isummertoqalinnginnerani imaluunniit Ittoqqortoormiit Kangerlussuani angallannerup killeqarfilersorneqalinnginnerani.

NN PAN-imit ilisimaneqarpoq umiarsuit takornariartaatit sorliit Nunami Eqqissisimatitap eqqaani angalaartarnersut, taakkunanngalu amerlanerpaat umiarsuarnik takornariartitsisarnermik peqatigiiffimmut Arctic Expedition Cruise Operators-imut (AECO-mut) ilaasortaapput. Peqatigiiffimmit malittarisassanik arlalinnik sakkortuunik suliarinnittoqarsimavoq, tamakku ilaasortaasunit malinneqartartussat – taakkununga ilanngullugu umiarsuit arfernut qanoq pissuseqartassanersut. Peqatigitillugu APNN isumaqarpoq, umiarsuit Ittoqqortoormiit Kangerlussuanut pulasartut, Nunamut Eqqissisimatitamut angalasartuneersuusartut.

26. jan 2011
Sagsnr. 2011-044782
Dok. Nr. 548235

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nanoq.gl
www.nanoq.gl

APNN-imitaaq Pinngortitaleriffik (GN) apeqquummut tunngatillugu tusarniarneqarnikuuvoq. Pinngortitaleriffimmit akissutigineqarpoq, Ittoqqortoormiit Kangerlussuani pisarineqartartut oqaluttuarisaanikkut assorsuaq allanngorartuusut; qilalukkanik qernertanik amerlasuunik pisaqartarnerit aamma Ittoqqortoormiit Kangerlussuata avataani pisarput (soorlu Rømer Fjord-imit 2008); pujornerani nilliasaatip nipiliornera umiarsuup sarpiisa nipiliorneranik qallerneqartarpoq, aammalu arferit qanorluunniit pisoqaraluarpat Milne Land avaqqullugu ingerlasarput pisarineqarsinnaasarlutillu piniartoqarfiit saneqqutileraangatigik.

Najukkami innuttaasut soorunami annertunerpaamik isumaginiarneqartussaapput. APNN-ip tungaanit paasineqarpoq, piniakkatigut soqutigisat oqimaaqatigiissinneqassasut najukkami takornariartsinermik inuussutissarsiteqarnikkut aningaasanik isaatitsisinnaanermi periarfissanut sanilliullugit. Aqutsiveqarfilli Ittoqqortoormiini qilalukkanik qernertanik assigiinngisitaartorujussuarmik pisarineqartartut eqqarsaatigalugit, ukiumoortumik pisarineqartartut nalunaarutigineqarsimallutik piffissami 2005/-2006-imiit 2009/2010-mut 0-miit 39-anut (2009/2010-mi qilalukkat qernertat 12-it) ajornakusuulaarpoq isiginiassallugu, umiarsuarnik takornariartaatinik angallanneq sumiiffimmi qilalukkanik qernertanik pisaqartarnermut annertuumik sunniteqarsimasutut.

Periarfissaqarporli Ittoqqortoormiit Kangerlussuani killeqarfilersuinissaq, tassani kangerlussuup ilai eqqissisimatinneqarsinnaallutik. Taamaasiornissami qanimut suleqatigiinnissaq pisariaqassaaq NN PAN-ip, Inuussutissarsionermut Suliffeqarnermullu Naalackersuisoqarfiup, Ineqarnermut, Attaveqarnermut Angallanermullu Naalackersuisoqarfiup kiisalu APNN-ip akornanni, imaasiallaannarli pisussatut naatsorsuutigineqannngilaq, periarfissaalluarlunili.

Qulaani allassimasut tunngavigalugit APNN-imit isumaqarfigineqarpoq pissusissamisoornerpaassasoq Inatsisartunit Nunamut Eqqissisimatitamut tunngatilugu peruserineqartussap qulaajaavigilluarneqarnissaa, Ittoqqortoormiit Kangerlussuani angallanneq pillugu annertunerusunik iliuseqalinnginnermi.

Inussiarnersumik inuulluaqqusillunga

Ane Hansen